



partii naleraq

12.maj 2016

UPA2016/49

Sumiginnaanerit pillugit nalunaaruteqartarnissanut kommunini ataatsimoorussamik oqarasuaammik aalajangersimasumik sianerfigineqarsinnaasamik pilersitsinissaq pillugu kommuninut isumaqatigiinniaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Sianerfigisinnaasatigut nuna tamakkerlugu kalerriutigineqartut tigooqqarneqartassapput, kommuninullu pineqartunut erngertumik ingerlateqqittarnissaat qulakkeerneqassalluni. Ulloq unnuarlu sianerfigisinnaasap ilusilernissaanut Naalakkersuisut kommunit peqatigalugit aalajangiisinnaatitaassapput. Siunertarineqartoq, tassaasoq innuttaasut tamarmik pisariunngitsumik pisortanut sianersinnaalernissaat sumiginnaanernillu kalerriisinnaalernissaat taamaalilluni anguneqassaaq.

(Inatsisartunut ilaasortaq Naaja H. Nathanielsen, Attaviitsoq)

Inatsisartunut ilasortaq Naaja H. Nathanielsen attaviitsoq, Naalakkersuisut peqqunneqarnissaanik tassalu sumiginnaanerit pillugit sianerfigineqarsinnaasumik pilersitsissasut tamannalu oqaaseqarfigissavarput.

Nunatsinni meerartatta pitsaasumik atugaqarnissaat, kiisalu ulluinnarni inuunermikkut inuunerissaartillugit inuiaqatigiinni inoqataanissaat pingaartorujussuusoq oqaatigissavarput. Kisiannili ajoraluartumik meerartatsinnut sumiginnaanerput annertuallaarujussuuartoq ersertuunnagu oqaatigisariaqarparput.

Ulluinnarni inuuniarnikkut atukkat inunnut amerlasuunut annertuumiik oqimaarsartitsipput, tamannalu aamma soorunami sunniuteqarpoq meeqqanut amerlasuunut. Tassami akuersaarneqarsinnaanngitsumik sumiginnaanerujussuit, aammalu meeqqat amerlasuut angajoqqaaminnik qimagutsinneqarsimasut eqqarsaatigissagaanni ilungersunartorujussuarmik atugaqartinneqarput, tamannalu ataatsimoorullugu qaangerniartariaqalerparput.

Pisortat sullissinerat meeqqanut tunngatillugu pitsanngorsartuariaqarpoq, tassami ilaatigut misinnartarmat meeqqanik sullissineq arrippallaartumik ingerlanneqartartoq, aammami tupinnarpallaarunangilaq pisortanimi kommuninilu isumaginninnikkut sullissisut suliaasaqarpallaarput, immaqalu suliat ilungersunannginnerusutut isigisatik allaat tunulliuttarlugit, tassamili suliaasat amerlagaarmata taamatullumi ingerlanerput ilungersunarpallaarujussuarpog.

Sumiginnaanerit pillugit sianerfigineqarsinnaasut pisortanullu attaveqarnerit sukkanerusumik ingerlalissappata pinngitsoorneqarsinnaarpasinnigillat, taamaatumik siunnersuuteqartup Naaja H. Nathanielsen-ip siunnersuutaa isumaqatiginartorujussuuvoq.

Aammalu kommunit namminneq suleriutsiminnik pitsanngorsaaniarnerat qujanartumik malunnarsiartorpoq, assersuutigalugu soorlu Qaasuitsup kommunia, namminneq kalerriisarfimmik pilersitsisimanera nersualaarparput, taamatullu aamma Sermersuup kommunia aamma suleriutsiminik meeqqat ilaqutariillu iluamik ingerlanissaat anguniarlugu suliniuteqarnera aamma nersugassaavoq neriunniartalu tamakkua suliniutit siunissami pitsaasumik inuunerissaarnerulernermillu kinguneqarumaartut.

Taamatut oqaaseqarluta Naaja H. Nathanielsen Attaviitsoq siunnersuutaa taperserparput peqqinnissamut isumaginninnermullu ataatsimiititaliami suliarineqarnissaa innersuussutigaarput.

Hans Enoksen